

山右叢書

楊博奏疏集_下

[明]楊博 撰 張志江 點校

上海古籍出版社

山右叢書

山右歷史文化研究院 編

楊博奏疏集_下

[明]楊博 撰 張志江 點校

上海古籍出版社

楊襄毅公本兵疏議卷十三

遵諭嚴飭薊鎮邊備疏

少保兼太子太保、兵部尚書臣楊博等謹題：爲傳奉聖諭事，職方清吏司案呈，奉本部送。該內閣傳奉聖諭：“兵理可用心否？十路可聞二三齊否？不過往來文書。昨二次風異，必非無應恩示，宜小心。”欽此。欽遵，傳奉到部送司，案呈到部。

臣等捧讀聖諭，仰見皇上留意邊警，至精至密，無任欽服。查得薊遼總督都御史劉燾原題十路客兵正月入關，宣大總督尚書江東見將大同、宣府、山西三鎮援兵具奏整擲，又奏稱賊虜俱在大同邊外住牧，候哨有東過白草川、三間房消息即便入關策應。內外防禦之略日慎一日，不敢少怠，除通行劉燾等小心嚴備，宣、薊二鎮總督但有奏到事宜，臣等即時議覆，務保萬全。

嘉靖四十三年正月初七日題，奉聖旨：“是。邊防當慎，朕已屢下諭，便行與劉燾等，悉心幹理，仍行京營，一體上緊選練，各不許以虛文取罪。”欽此。

覆巡撫保定都御史魏尚純
酌議春防兵馬疏

題：爲懇乞天恩，計處防春兵馬，以弭虜患事，職方清吏司案呈，奉本部送，兵科抄出，巡撫保定等府兼提督紫荊等關、都察院右副都御史魏尚純題，奉聖旨：“兵部知道。”欽此。欽遵，

抄出送司，案呈到部。

看得保定一鎮原無防春事例，若論地方衝緩，則馬水口逼近保安，第一該防。至於紫荆、倒馬二關，大舉之寇多由大同突入，計二關至邊五六百里，候其入邊方行擺守，亦不爲遲，相應通行酌處。合候命下，備行都御史魏尚純、總兵官尹秉衡，即將馬水口應擺兵馬於正月終旬上邊，其餘紫荆、倒馬應擺兵馬俱在本處練候，一面差人於大同遠哨，果有大舉入邊消息，作速督發，一體擺守。若賊虜大勢東過白草川、三間房一帶，則是犯薊鎮，又聽總督劉燾相機調援，共保萬全。

嘉靖四十三年正月十七日題，奉聖旨：“是。着鎮巡官於宣大地方先時遠哨，酌量緩急發兵防守。”欽此。

請命薊鎮邊臣哨報虜情疏

題：爲申嚴薊鎮哨探，以圖萬全事，職方清吏司案呈。照得西虜辛愛等，該宣大總督、鎮巡官十日一奏，東虜土蠻等，該遼東鎮巡官十日一奏，俱經奉有欽依通行外。所據薊鎮若不嚴加探哨，止以耳目寄之別鎮，萬一誤事，干係匪輕，乞爲查處，案呈到部。

看得薊鎮哨探一事，委當一體舉行。合候命下，行移總督都御史劉燾、總兵官胡鎮、巡撫都御史溫景葵，通行十路副參等官，各差的當人役出境遠哨，自正月二十五日爲始，每十日將有無虜情緣由照依宣大、遼東事例各另具奏，不許疏怠遲緩，及妄掇捕風捉影之言，致誤大計。

嘉靖四十三年正月十九日題，奉聖旨：“是。着劉燾、胡鎮、溫景葵嚴行各路將官，差人遠哨虜情，照例奏報。”欽此。

覆薊鎮督撫官劉燾等 條議撫恤軍情事宜疏

題：爲陳言邊務，以懲夙弊，以飭武備事，職方清吏司案呈，奉本部送，兵科抄出，總督薊遼保定等處軍務兼理糧餉、都察院右副都御史劉燾題，奉聖旨：“戶、兵二部看了來說。”欽此。又該整飭薊州等處邊備兼巡撫順天等府地方、都察院右僉都御史溫景葵題，奉聖旨：“戶、兵二部看了來說。本內將官白文智、傅津、郭琥、佟登、張懋勛能計處撫恤軍士，各賞銀二十兩、紵絲二表裏。”欽此。欽遵，通抄送司，案呈到部。

看得總督薊遼軍務右副都御史劉燾、巡撫順天等府右僉都御史溫景葵等具題四事，大率均係恤軍事宜，合就開立前件，議擬上請定奪。

嘉靖四十三年正月二十五日題，奉聖旨：“依議行。”欽此。

一、總督都御史劉燾所題，大率欲要將各營軍士照冊查出，精壯者盡發營操，老弱者選補牢伴，查照題准事例定擬名數，一應打柴與鍍銀、挑繡之匠嚴加禁革各一節，委得正本清源之意。合無移咨總督劉燾、巡撫溫景葵，通行各路將領，各將本營食糧軍士照冊查出，搜選精壯者盡發營操以備戰守，老弱者即充牢伴以備差遣。仍遵照先年題准事例，鎮守總兵每員軍伴二十四名，副總兵每員二十名，分守、參將、遊擊十八名，守備每員十二名。提調以都指揮體統行事，與守備職銜、責任相同者，每員十名。坐營中軍比照各衛管事指揮，每員四名。管操、領哨等官，每員二名。其打木、擔柴、鍍銀、挑繡等匠通行查革，敢有分外多占者，悉聽督撫官坐贓參問。至於定議把式、較射鎗箭、置簿

稽查等項事宜，悉如所擬施行。

一、總督都御史劉燾所題，大率欲要廣召募以備緩急，急抽選以圖經久，厚撫恤以免逃亡各一節，中間議處俱已周悉。合無依其所擬，備行總督劉燾、巡撫溫景葵，一面差委能幹官員出關分投召選，合用安家銀兩照依所擬之數酌量查給。本部仍行各鎮督撫衙門，行令各該地方，如有願赴薊鎮投軍者不許阻留，彼此同心，共濟其事。一面行令薊鎮沿邊軍衛有司，因其地方大小，定以抽選人數，原額均徭不得累及見在人戶，所遺均徭改撥富庶地方。一面行令各該將領置立點軍文簿二扇，將所管軍士嘉靖四十三年爲始，分別舊管、新收、開除、實在四行，逐款明白按月登記循環簿內，赴總督軍門倒換，查考軍數之盈縮，定將領之賢否，仍聽巡按、巡關御史出巡之日稽查舉刺以修實政。

一、巡撫都御史溫景葵所題，大率言參將白文智議開煤窑，抽取課銀，得策之上；副總兵傅津議采柴草，易賣價值，得策之中；參將郭琥議將米糧放於酒房，銀兩放於鋪戶，量取利息，得策之下。要之皆爲撫賞，除采柴恐開私役之端，放債近於市井之習，俱難依行外，合無備行總督劉燾、巡撫溫景葵，行令各路將領等官，隨其所在，各將興利事宜果有如白文智開取煤窑者議呈督撫衙門，逐一詳酌施行。公用銀兩再不敷用，徑自會題，聽本部與戶部另處。如有踵襲前弊及科派、剋減等項，悉聽督撫官并巡按、巡關御史指名參治。

一、巡撫都御史溫景葵所題，大率言營中出差、力作、邊功者皆貧軍，科斂不加、袖手高坐者皆富輩，欲要今後各官軍伴止於三等軍士照例取用，不許占用殷實得過之人，其餘匠作、護敕、種地等項名色盡數革除一節，查與總督劉燾前款所題大略相同，合無一體嚴行申飭。至於各該家丁既有行糧、月糧，又有關領馬匹，不許以兌馬爲名占軍幫貼。凡有應修工程及不得已

灘^{〔一〕}派，一例均平，不得徇私偏累。中間如有怙惡不悛，仍前私占，致妨操練，或貽累衆軍者，聽督撫官從重處置，該管官併行參究。

分布援兵豫備薊鎮調遣疏

題：爲預布援兵，以重春防，以保萬全事，職方清吏司案呈。先該本部具題，內一款“一、議處鄰境添調援兵”，節該總督宣大尚書江東等、巡撫保定都御史魏尚純等各將整棚過援兵緣由會題前來。即目正月將盡，二月倏臨，在東虜則仰仗玄威，追逐遠遁，石門諸路已收保障之功；在西虜則結聚近境，乘隙窺伺，古北諸口當嚴防禦之略。所據鄰境援兵不嫌於多，多多益善，呈乞查處，案呈到部。

看得薊鎮地方近在畿甸，比之別鎮迥不相同。虜未至則當悉心畫守，以伐其謀；虜已至則當竭力堵截，以屈其力：大率地利、人力二者均不可少。除總督劉燾先將十路兵馬分布停妥，見今次第入關且修且守外，所據臣等之原議鄰鎮援兵，宣府五枝共該一萬五千名，大同三枝兵共該九千名，山西三枝共該九千名，保定三枝共該三千名，遼東一枝共該三千名，通共三萬九千名，相應預爲定擬。合候命下，備咨江東、魏尚純并遼東巡撫都御史王之誥，各照後開事宜，嚴行各將查照遵行。無警則仍在原地駐札聽候，萬一有過白草川、三間房之訊，不必聽調，徑自入關，庶幾士馬雲集，戰守允賴。

嘉靖四十三年正月二十九日題，奉聖旨：“是。”欽此。

一、宣府總兵官馬芳，已經臣等調在懷來駐札，果有東警，即便統領所部正兵三千員名并東路遊擊麻錦下遊兵三千員名、宣

府新遊擊崔世榮下遊兵三千員名作速入居庸關，或應防守各路，或應防守郊圻，悉聽總督劉燾徑自分布。

一、大同總兵官姜應熊，已經臣等調在懷安駐札，果有東警，即便統領所部正兵三千員名作速入居庸關，仍將本鎮東路遊兵三千員名一併帶領入關，悉聽總督劉燾徑自分布。

一、保定總兵官尹秉衡見在保定駐候，果有東警，即便統領所部標兵三千員名，由涿州、良鄉前進，聽候總督劉燾徑自分布。

一、遼東總兵官佟登，已經臣等調在寧前駐札，果有西警，即便統領所部正兵三千員名作速入山海關，聽總督劉燾分布東路，公同石門、燕河、太平三路參將白文智等隨賊向往，協力防守。

一、山西總兵官董一奎，已經臣等調在順聖東城駐札，果有東警，即便統領所部正兵三千員名作速入居庸關，仍將本鎮遊兵一營三千員名一併帶領入關，悉聽總督劉燾徑自分布。

一、宣府副總兵麻祿，已經臣等調在永寧駐札，果有東警，即便統領所部奇兵三千員名作速入居庸關，聽總督劉燾徑自分布。

一、總督尚書江東見在懷來駐札，果有東警，即便統領標兵三千員名并大同西路遊兵三千員名、山西援兵三千員名速赴居庸關，相機進止，以示犄角之勢。前項各起援兵，有功與薊鎮將領同其升賞，有罪與薊鎮將領同其譴罰。

一、保定都御史魏尚純，如果有警，徑趨涿州、良鄉等處。遼東巡撫都御史王之誥，如果有警，徑趨山海等處。其大同巡撫都御史張邦彥、山西巡撫都御史楊宗氣、宣府巡撫都御史楊巍一面各守本鎮，一面選差勁兵，分搗虜巢，牽其內顧。

覆山東巡按御史 高應芳議處報效人役疏

題：爲議處地方事宜，以裨安攘大計事，職方清吏司案呈，奉本部送，兵科抄出，巡按山東監察御史高應芳題，奉聖旨：“兵部知道。”欽此。欽遵，抄出送司，案呈到部。

看得巡按山東監察御史高應芳題稱，訪得濮州原任守備、今充軍陳良謨，在淄川縣與生員王勛、司守約、司守敬、王汝弼、牛在峰、畢聳、程章、丁汝勉、劉課召募精兵四千，一聞虜警，踴躍爭赴，及至事平，隨即散伏。即今古北揀練用人之際，乞將陳良謨、司守敬、王勛充冠帶把總名目，行令山東巡撫張鑑出榜有其私自糾衆罪名，給文赴薊鎮軍門聽用。其餘情願報效者一體收送，就令陳良謨、司守敬等管領。果能殺賊立功，照例升賞。知縣許遷職擅出私交，合應提問各一節。爲照前項願報效人役，警至而募兵趨赴，似有敵愾之心；警退而束身歸散，原無携二之迹。但未奉官司明文，事屬專擅，堅冰之漸委當預防。既該巡按御史高應芳具題前來，相應通行議擬。合候命下，移咨巡撫都御史張鑑，即將陳良謨、司守敬、王勛俱各授以冠帶把總名目，專聽民兵參將李洲節制，仍將義勇四千名造冊在官，省令照常生理。如遇薊鎮防秋，果有自備鞍馬、口糧，願從民兵報效者，巡撫官查理明白，交付李洲統領報效；不願者不宜強逼。有功之日，與官軍一體升賞。知縣許遷職私交有罪，緣事本因公，姑免提問，移咨都察院，轉行高應芳，量加戒飭，以示後戒。

嘉靖四十三年二月初二日題，奉聖旨：“是。”欽此。

覆監察御史王汝正條議邊務疏

題：爲陳愚見，議兵食，以圖內治，以安重鎮事，職方清吏司案呈，奉本部送，兵科抄出，浙江道監察御史王汝正題，奉聖旨：“該部看了來說。邊餉奸弊多端，尤須詳計嚴禁，以副朝廷任官養兵之意。”欽此。欽遵，抄出送司，案呈到部。

看得浙江道監察御史王汝正條陳五事，合就開立前件，議擬上請定奪。

嘉靖四十三年二月初六日題，奉聖旨：“兵備道以飭兵保固地方爲職，有功既與將官同賞，豈得不同其罰？着照劉燾近題准分路事理行。其餘依擬。”欽此。

一、預傳報以圖收斂。蓋有鑒於去冬之事，若果傳報得早，多方收保，全活必多。合無備咨總督劉燾，督同鎮巡官胡鎮、溫景葵，通行各路將領，如遇春秋兩防，多差的當人役遠爲哨探，果有人犯消息，着落該道兵備官預先傳報，責令有司製火牌十餘面，差陰陽、義官分投各路傳示鄉民，早爲收斂以保萬全，違者查究坐罪。

二、設奇兵以剿零寇。大率欲要遇賊入境，主將領兵結營，與賊相持，仍選驍將，專領勁兵，四散分掠零騎，邀截剿殺，是亦兵家之一策。合無備行總督劉燾，督同鎮巡官胡鎮、溫景葵，今後遇賊入境，主將一面領兵拒堵，一面分遣驍將出奇取道，趨赴所掠地方，或夜擊賊營，或邀截零騎，隨機應變，務收全功。如或觀望誤事，聽總督官徑以軍法從事。

三、議守城以保郡縣。蓋因邇來虜賊一見野無可掠，輒肆攻城之計，即如平谷之事，可以爲鑒。合無備咨總督劉燾、巡撫溫

景葵，通行各該兵備道，責令守備、有司等官各將守城軍役從實操練，並將城中壯丁盡數查出，與守城軍役各備精利器械，每城分爲四面，每面設火器若干，并派定垛口地方，開造文冊。無事之日，守備官止許操練軍役，不許騷擾居民；有警之時會同有司，照依編定地方上城分守。如無守備，州縣就令有司、衛官一體舉行。

四、禁科剋以恤邊軍。近該巡撫順天都御史溫景葵具題，本部覆奉欽依，極爲詳備，查與御史王汝正所見大略相同。合無備咨總督劉燾，督同鎮巡官胡鎮、溫景葵，今後有事巡邊，一毫不許取辦軍士，仍通行各道并各該將官，凡遇經過營堡，除應支糧餉外，不許分外索取下程。如無糧餉者，各令自備芻糧，或准動自理紙贖，委官供應，亦要出示嚴禁各旗牌人等，不許騷擾地方。各處守堡等官亦不許指稱科派。違者聽巡按、巡關御史訪拏，坐贓重治。

五、明職守以專責成。大率欲將各兵備官無事令其查理兵食，遇警守欵保守。至於邊牆失守，不得與將官一例同責，深爲有理。合無斟酌所擬，備咨總督劉燾、巡撫溫景葵，行令各兵備官，無警每年正月半上邊，三月盡下邊，七月初上邊，九月盡下邊，各照區分撫處夷情，聽理詞訟，選練人馬，修理關營、墩牆、城池、堡寨，管理神器、甲仗，修蓋營房、倉庫，預備主、客糧餉，稽查一切奸弊。如有邊工未就之緒及間閱兵馬諸務，仍選委州縣才能正官一員前去代理。及將所管區分主兵通行搜選，公同該路將領設法教練，遇警收斂人畜，處置行糧，監督戰守，主、客大小將領如有臨陣退縮及不公不法，俱許指實參究。其謀勇勤勞者，具呈督撫衙門甄別奏請，仍聽總督、巡撫官節制。萬一邊關失守，不得與將官一概坐罪。各道敕書通行換給。

覆都給事中邢守庭等 條議春防邊務疏

題：爲敷陳末議，以備春防采擇事，職方清吏司案呈，奉本部送，兵科抄出，兵科都給事中邢守庭等題，奉聖旨：“該部看了來說。”欽此。欽遵，抄出送司，案呈到部。看得兵科都給事中邢守庭等條陳三事，合就開立前件，議擬上請定奪。

嘉靖四十三年二月初六日題，奉聖旨：“軍令必嚴乃能制勝，各鎮將領但有抗違玩愒的，着總督、鎮巡官指名參奏，以憑重治。降敕、差官不必行，其餘依擬。”欽此。

一、申節制以一士心。臣等議得，防邊之要，第一在於號令嚴明，其次在於賞罰明信。號令明則大將之威行於外而人知畏讐，賞罰信則朝廷之政定於一而人有勸懲。除薊鎮拒堵之功雖無首級者一體世廕，哨探之使能得的訊者即與升賞，節經奉有欽依，無容別議外，所據副參、遊守等官自有虜患以來怠玩成風，鮮遵約束，誠如該科所論。合無依其所擬，備行翰林院，查照今議，專撰敕諭一道，本部選差司屬官一員前去薊鎮宣布德音，嚴令各該將領，一切戰守機宜悉聽總督、鎮巡節制。敢有抗違玩愒者，輕則以軍法從事，重則指名參奏，拏解來京，置之法典。庶幾臂指可成，腹心自固，提綱挈領，無過於此。

一、分駐札以固重鎮。臣等議得，陽和一城，在內則當宣、大之中，在外則爲華夏之限。總督駐於懷來，勢既不能西顧；巡撫近在雲中，事自可以兼防。該科所論，無非圖維萬全之意。合無備行總督江東，嚴行陽和兵備副使、分守參將，督率各城守備、把總等官，居常加謹哨備，有警相機堵剿。大同巡撫都御史

不時往來巡莅，修明邊政。候薊鎮寧謐，江東照舊駐札陽和，控制三鎮。

一、遵明旨以修實政。臣等議得，薊、遼去京師爲近，寔有申畫郊圻之責；陝西四鎮與山西一鎮去京師雖遠，亦有慎固封守之寄。大抵均承簡命，分閫一方。力求實效，尚恐職業之弗修；苟事虛文，必致邊政之大壞：委當通行申飭。合無移文各鎮總督、鎮巡官，查照該科所議，即將一切防禦事宜遵奉明旨從實舉行，不得玩愒因循，自貽罪戾。違者聽巡按御史與本部指名參治。至於守衛官軍苦於役占之多，全無嚴肅之體，合行巡視科道并本部郎中陳詔，晝夜點查，以祛夙弊。其都給事中邢守庭原定牌面式樣，務要速爲制造，通完之日，郎中陳詔呈部查考。

覆薊遼總督都御史劉燾等 一片石拒虜功賞疏

題：爲欽奉明旨，分別堵截有功官員等第事，職方清吏司案呈，奉本部送，兵科抄出，總督薊遼保定等處軍務兼理糧餉、都察院右副都御史劉燾題，奉聖旨：“軍功論賞，除總督、鎮巡外，其餘文武官非實在地方戰守者不宜濫預。這本內所開的，兵部還斟酌定擬來說。”欽此。又該鎮守薊州永平山海等處地方總兵官、前軍都督府都督同知胡鎮題，內稱巡按御史董堯封、巡按御史黃泮，法紀素行于諸將，風裁久動乎三軍，不戒以孚，戎有攸賴。總督軍務右副都御史劉燾，任事纔方三月而軍令維新，決策每求萬全而人心丕應。一聞喜峰之報，即遣大將以東馳；再聞義院之傳，復遣標兵而聲援。功成有自，發縱居先。但御史係朝廷耳目之官，總督乃地方共事之長，節奉禁例，俱不得互相稱引，並不

敢論。巡撫右僉都御史溫景葵，爲地方保障，不辭晝夜籌畫之勞；知將卒甘苦，不惜千金鼓舞之費。號令多施於平日，調度克濟于臨時。虜謀未發而機先得，使諸路之防在在有備；警報方聞而氣已奪，驅見敵之士個個爭先。似其指縱之功，誠不在摧鋒之下。此一臣者又非臣敢擅言也。奉聖旨：“兵部知道。”欽此。又該整飭薊州等處邊備兼巡撫順天等府地方、都察院右僉都御史溫景葵題，內稱鎮守總兵官都督同知胡鎮，心恒許國，志切吞胡。聞報長驅，三晝夜而行八百里路；望風直擣，一咆哮而却數萬賊兵。始于黃土嶺之摧鋒，毳裘膽落；既而山海關之遣將，羊犬計窮。允矣無怠而無荒，誠哉有謀而有勇。似此土嶺之烈，無忝土牆之功，此一臣者所當首論，以備廢賚者也。奉聖旨：“兵部知道。”欽此。欽遵，通抄送司，案呈到部。

看得總督薊遼保定軍務右副都御史劉燾題稱，查勘過本年正月內一片石等處官軍堵回大虜獲功緣由，及稱鎮守薊州總兵官都督同知胡鎮所當廢賚，石門寨參將白文智所當出格升賞，總兵官標下遊擊董一元、山海守備趙雲龍厚加升賞，守山海關主事商誥、薊州兵備帶管永平道右參政紀公巡所當甄錄，固原遊擊周池，白文智下親丁白武卿、白棟、白漢、白勛、白潤，中軍黃都，千總楊秉中、江川，提調馬文龍，趙雲龍下親丁趙雲鳳、趙雲海、趙應捷，中軍符楨，指揮施國藩、石寶、任鶴年、王傑，經歷魏公道，胡鎮下親丁胡天福、胡天祿、陳平、郭大勛、劉從武、楊天伏、陳海、蘇子中、賈倫、王宗儒，前鋒官陳嘉猷、王光祖、薛論道、丁從化，中軍劉九經，千把總梅應春、孫世勛、宮麒，董一元下千總李芝，石門寨隨伍官李福，北水關百戶虞政所當通論升賞，內白武卿、趙雲鳳尤宜優厚。燕河營副總兵傅津，永平遊擊張懋勛，聽用原任參將徐枝，軍門標下振武營參將帶管中軍事李勇，巡撫標下中軍、原任參將徐致中，石門寨武舉

官郭江，三屯營武舉官毛希遂量加升賞。建昌營參將尤月，遊擊李著，巡撫標下參將李康民，太平寨參將時鑾，馬蘭谷千總閻儒，軍門標下參將黃演、王孟夏，寧夏遊擊石玉，一片石提調王庭棟，千總王世爵，黃土嶺管操官呂納，守關官解性，大青山守關官田登，董一元下中軍黃升，喜峰口守備羅端，義院口提調王允文，管夜不收官朱添福等二十八員，原任遊擊竇淮、原任都司姚允中、三屯營管領家丁百長官王自進等二十七名所當賞勞。令典張相等五名准容比例。哨夜張才等五名探報得實，通應犒賞。被傷軍丁郭勛等三十六名奮不顧身，通行優恤。石門寨、山海關各主兵，三屯營標兵，固原營援兵通應加犒。乞要再加詳議，照例酌量升賞、犒勞、優恤。其餘獲功、陣亡人等，通行巡按衙門勘明具奏，另行升賞。及該巡撫都御史溫景葵備言總督劉燾之功，以爲地方共事之長，總督都御史劉燾備言巡撫溫景葵之功，以爲地方共事之臣，不敢互相稱引各一節。爲照蠡爾東胡，爲謀奸猾，方當草枯馬弱之時，欲逞虎噬狼貪之計。幸賴皇上聖武布昭，玄威震疊，預飭春防之淵略，屢勤兵理之德音，天風昭示于先時，海波效靈于臨事。始攻黃土嶺，參將白文智首挫其鋒；繼攻一片石，總兵胡鎮中殺其勢；再攻山海關，守備趙雲龍後擊其歸。數萬之虜狼狽而退，千里之邊安堵如舊。伏望聖明擇日謝玄以答庥貺，仍乞敕下禮部，奏遣彼處巡撫官祭告海神，以昭百靈助順之效。至於地方文武官員宜加恩勞，誠如聖諭，既經總督、鎮巡劉燾等分別等第，會題前來，臣等復加酌擬。除原非戰守及巡按、巡關御史例不論功，俱不敢濫擬外，總督右副都御史劉燾、巡撫右僉都御史溫景葵，身雖未莅於三軍，心實已竭乎百慮；總兵官都督同知胡鎮，聞警而率衆先登，遇敵而誓死轉戰：相應與參將白文智等一體優錄，以示激勸。合候命下，將劉燾重加升賞，胡鎮特加廕資，溫景葵同加升賞，白文智、趙雲龍、董

一元超格升賞，商誥量加升賞。紀公巡量升俸級，仍加賞賚。白武卿、趙雲鳳重加升級，周池、白棟等三十八員名各加升級。傅津、張懋勛、徐枝厚加賞賚，尤月、羅端、王允文量加賞賚。朱添福等二十八員名，總督軍門分別犒賞。陣亡旗軍范勛等四名照例襲升二級，被傷旗軍郭勛等三十六名照例優恤。哨夜張才等五名哨探明的，戰守有賴，各加升級。仍與石門寨、山海關各主兵，三屯營標兵并固原營援兵動支太僕寺馬價銀八千兩，解送軍門，分別賞勞。斬獲首級，聽巡按御史覈實明白，另行升賞。

嘉靖四十三年二月十一日題，奉聖旨：“朕荷皇穹眷佑，狡虜退遁，邊境載寧。祭告海神，着禮部奏舉。有功人員，你每既酌擬停當，劉燾升兵部右侍郎兼都察院右僉都御史，照舊總督，還賞銀四十兩、紵絲二表裏。胡鎮廕一子與做錦衣衛署百戶，溫景葵升俸二級，各賞銀三十兩、紵絲二表裏。白文智、趙雲龍、董一元各升三級，賞銀二十兩、一表裏。商誥升一級，紀公巡升俸一級，各賞銀十兩。白武卿、趙雲鳳與做原衛所鎮撫。周池等、張才等各升一級。傅津等各賞銀十五兩。尤月等各十兩。其餘依擬。”欽此。

覆江西巡按御史陳志覈實 叛兵袁三功賞疏

題：爲流寇突犯鄰省，深入鄱湖，乞敕撫操諸臣合兵夾剿，以靖地方事，職方清吏司案呈，奉本部送，兵科抄出，巡按江西監察御史陳志題，奉聖旨：“該部知道。”欽此。欽遵，抄出送司，案呈到部。

看得巡按江西監察御史陳志題稱，廣賊袁三餘黨流毒地方，

各該官兵生擒一百二十六名，斬首九十一顆。及稱參政王應時，副使塗澤民、陶承學，參議陳宗虞、崔都，僉事盧岐嶷、崔近思、祝繼志，把總樂墳所當首錄，都督僉事劉顯，參將梁守愚，遊擊將軍盧錡，知府劉𤇆，同知楊侃、袁珠，通判畢效欽、舒壘、梁繼芳、何諮，推官楊徵，守備李超、吳國，指揮曹清，知縣游日章、高岡、王葵，千戶劉添榮等六員所當併錄，百戶馬效龍、丁沂相應免究。及稱原任巡撫江西右副都御史、今升兵部左侍郎胡松，謀成多算，功收萬全各一節。爲照叛兵袁三等，自嘉靖四十年五月背叛流劫以來，直至江西，陽稱投兵，陰實爲亂。江西撫按官察知其情，差官伴送浙江軍門收用。行至玉山縣地方，遷延不進，肆行焚劫，上饒、永豐二縣俱被延害，縱橫五十餘日，糾連數千餘衆，因而劫掠福建建陽、崇安，流漫延平、汀漳等處，勾連逆賊張璉，幾破漳郡。後又突至泉州、順昌、甌寧，據險團結，欲過分水等關入湖入江以爲巢穴。巡撫都御史胡松乃能一面具題，一面分遣勁兵數枝，遠出建陽、崇安，合圍夾擊，賊始挫衄。削群凶覬覦之迹，消二省荼毒之患，所據一時效勞人員既該巡按官覈勘前來。內胡松督偏裨以出境，先則制人，已奪狂悖之心；分諸道而防湖，隨處皆兵，茂建擒俘之績。御史陳志以爲“謀成多算，功收萬全”，殊非過論。王應時雖以別事革任閑住，其功亦難獨泯。係干激勸，相應通行議擬。合候命下，將胡松厚加升俸，以示勵獎。崔都、樂墳、崔近思量加升賞，王應時重加賞賚，劉顯、塗澤民、陶承學、陳宗虞、盧岐嶷、祝繼志量加賞賚。梁守愚等二十二員，巡撫衙門分別犒賞。丁沂准其贖罪，馬效龍免其究治。

嘉靖四十三年二月十五日題，奉聖旨：“是。胡松升俸一級，賞銀二十兩。崔都等各升俸一級，還與王應時、劉顯等各賞銀十兩。其餘依擬。”欽此。